

A D V I S
A V X
P R I N C E S
C H R E S T I E N S .
S V R L E S D E S S E I N S E T
Entreprises des Espagnols.

*Pour le Sujet des affaires publiques
de ce Temps.*




AN. 4. p. 1219.

M. DC. XXXII.

A. P. V. Sinner

Handwritten text, possibly a signature or date, located in the lower left quadrant of the page.



ADVIS AUX PRINCES CHRESTIENS.



LES orages qui ont agité ma patrie, & occupé le plus vigoureux de mon aage, ont esté des causes suffisantes pour diuertir mes pensées de tout autre object que celui de me garantir d'un naufrage. Maintenant que j'ay treuvé mon repos dans le milieu des ondes: que ma condition pour sa mediocrité est exempte de haine & d'euie: & que ie suis recueilly d'une Republique où tout homme de bien reçoit contentement, & où l'on peut avec liberté declarer ses pensées, ie me suis resolu de représenter icy les miennes sur les affaires publiques, afin que chaque Prince cognoisse sa condition, & qu'est ce qu'il doit craindre, ou esperer.

LES deux grandes Puissances qui tiennent en contre-poids les autres Princes de la Chrestienté, sont les Maisons de France & d'Austriche: car ce sont les seules qui peuuent sans secours d'autrui faire la guerre & l'entretenir tant qu'elles veulēt. ne man-

4

quants pour cet effet d'hômes ny d'argent.

LA PREMIERE a ses forces vnies, & se treuve posée entre l'Allemagne, l'Italie, l'Espagne, & l'Angleterre: Tellemēt qu'elle peut attaquer ou secourir puissamment lequel de ses voisins elle voudra.

LA SECONDE a ses Estats diuisez, qui luy ostent le moyen de pouuoir attaquer & secourir ses voisins, que foiblement.

LA PREMIERE n'est de si grande estēdue, ny composée de si puissantes Nations que la seconde: mais c'est vn Estat hereditaire de longue-main, qui n'est disputé de personne, accoustumé à l'obeissance & aux Loixanciennes du Royaume.

DANS LA SECONDE il s'y treuve de ses nouvelles vsurpations, & des peuples las du joug de la seruitude.

LA PREMIERE a pour Alliez fideles tous ceux qui ne redoutent la puissance de la seconde.

ET LA SECONDE a ceux qui par crainte n'osent se declarer contre elle, lesquels elle maintiendra tout autant de temps qu'elle conseruera la reputation d'auoir tousjours la paix & la guerre en sa main.

LA PREMIERE n'a dessein que de se maintenir.

LA SECONDE a celuy de s'accroistre.

LA PREMIERE ne veut la guerre qu'à l'extremité, & selon qu'elle y est forcée par la necessité de sa conseruation, ou de celle de ses voisins.

LA SECONDE a tousjours les armes à la main pour empieter quelques choses sur l'autrui.

LA PREMIERE tasche à maintenir en v-nion ses voisins, pour les faire subsister.

LA SECONDE d'y semer de la diuision, pour y profiter.

LA PREMIERE iustifie ses actions à la veuë de tout le monde auant que de rien entreprendre hors de ses limites.

LA SECONDE se saisit de tout ce qu'elle peut : puis cherche des pretextes pour s'approprier ce qu'elle tient.

Bref LA PREMIERE se contente de maintenir ce qu'elle possède :

ET LA SECONDE aspire à la Monarchie vniuerselle.

OR comme leurs desseins sont differets, aussi leurs procédures ont esté fort diuerfes. Car durant la jeunesse du Roy regnant en France on a voulu conseruer la Paix au dedans de l'Estat par la profusion des Finances: & au dehors en achetant l'amitié de la Maison d'Austriche, aux despens des Alliez de celle de France, & c'estoient des maxi-

mes de ce tēps-là, que de maintenir la grandeur de la branché d'Austriche en Allemagne, comme vn moyen subtil pour diuiser toute la maison, & l'affoiblir par là: & de cōseruer l'Empire dans ladite maison, cōme le seul remede d'ēpescher le progrès du Turc dans la Chrestienté: & de procurer la ruine des Princes Protestans en Allemagne, pour auancer la Religion Catholique Romaine.

Av contraire la maison d'Austriche, qui a son dessein formé dès long-temps qu'elle n'abandonne jamais, & qui fait toutes choses licites & illicites pour le faire reussir, entretiēt dedās tous les Estats de la Chrestienté ses Partisans, n'espargnant aucun argent pour corrompre les Ministres des autres Princes: Suscite la diuision par tout: la fomentē où elle est: & ne perd aucune occasion de s'aduantager où elle peut.

OR parce que le plus grād obstacle qu'elle rencōtre en son chemin est la Maison de France, c'est contre elle qu'elle fait ses plus grands efforts. Les diuisions de la Ligue, qu'elle a fomenté à vn si haut poinct, que pour les diuiser elle en a perdus les Pays bas, le tesmoignent assez. Depuis ce temps là, elle n'a obmis aucune occasion d'y semer les diuisions.

Mais en aucun temps elle ne s'est mon-

trée si dangereuse, que lors qu'elle a fait profession d'amitié avec la France. C'est lors que pour entretenir ceste bõne vnion, on l'a laissée affermir dans l'Empire, comme luy estant hereditaire, & asservir l'Allemagne; Et peu s'en est fallu qu'elle n'ait empieté les Estats du Duc de Mantouë, ayant fait des plus grands & dangereux progrès en dix ou douze années d'amitié avec la France, que durant toutes les plus fortes guerres qu'elle a eu à demesler avec elle. En fin elle a leué le masque en ceste derniere guerre, où vn chacun s'est desabusé.

On a fait quelques efforts pour secourir le Duc de Mantouë. On a redonné vigueur aux Prince Allemands: & au premier coup d'essay, on a fait voir que le mal n'est encore incurable, pourueu qu'on y pouruoye à temps, & qu'on ne se lasse non plus d'agir pour conseruer sa liberté, qu'elle ne fait pour asservir les autres.

Ce n'est pas tout d'auoir bien commencé qui ne perseuere: Et vaudroit bien mieux n'auoir point monstré ceste resistance, que de ne la continuer pas. Car l'apprehension qu'elle aura de voir ses desseins ruinez, la rendra plus actiue à les poursuiure.

Et si apres quelques resistance, la perte de ceux qu'on aura en fin abandonnez, s'en

ensuit, elle osterà le courage à tous les autres Princes, & leur persuadera que c'est en vain qu'on s'oppose à ceste puissance.

Si la tentatiue des Allemans sur le Royaume de Boheme eust esté soustenuë par la France, elle estoit capable d'abbaisser ceste superbe Maison: mais leur abandonnement les a precipitez en seruitude. L'effort qu'on a fait pour conseruer au Duc de Mantouë ses Estats, ne rompt le dessein de la Maison d'Autriche contre l'Italie, ny ne luy oste l'esperance. Si on luy a rōpu sa menée pour ce coup, elle ne s'en preparera que mieux pour recommencer son fault. Car tandis qu'elle aura cest aduantage sur les autres Estats, d'attaquer qui elle voudra, & que son pis aller sera de donner la paix pour attendre vn tēps plus fauorable; il faut qu'en fin elle vienne à bout de son dessein. Parce que les autres Estats reünis contre elle, ne sont tousiours en mesme dispositiō de s'accorder entr'eux pour se maintenir. Il arriue à toutes heures tant de changemens & reuolutiōs au gouuernemēt d'iceux, que c'est vne merueille de les voir auiourd'huy en mesme sentiment pour leur conseruation.

Ne laissez donc point perdre ceste conjoncture d'affaires: Faites vostre profit des fautes passées, & ne vivez plus au iour la iournée, mais

formez vn dessein entre vous, & foyez constants à le poursuiure.

VOUS VOYEZ D'OV VIENT VOSTRE MAL: PORTEZ-Y LE REMÈDE, & le cherchez iusques à la racine, afin de l'esteindre: & que le travail, ny la despence ne vous rebute.

Car il vaut mieux faire vn bon effort pour guerir tout à fait, que de vous amuser à des cures pailliatiues, qui ne font qu'allonger la maladie, du patient, & ne le guerissent pas.

Puis que le dessein de la Maison d'Autriche est d'asseruir les autres Princes: que celui de la Maison de France soit de conseruer leur liberté. Et puis que celle la tasche de s'accroistre aux despens de tout le monde.

Que celle-cy par vn contrepied procure l'accroissement de ses amis.

Pour fonder ce dessein dans la Iustice & possibilité, & pour le faire reüssir seurement, il ne faut entreprendre que sur les vsurpations de ladite Maison, & non sur son patrimoine ancien. Car c'est là ou l'on la treuuera foible, & ou chacun se portera ardemment, tant pour se liberer du mal, que pour se procurer du

bien.

Chacun sçait à quels tiltres la maison d'Austriche tient les Estats qu'elle possède en Italie : & comme l'Empire est Electif, & sous qu'elle dure servitude les Allemands se treuvent iniustement reduits.

Cesont ces deux grandes Nations qu'il faut mettre en liberté.

P O U R l'Allemagne, il se void maintenant que le party des Protestants a plus manqué de bonne conduite, que de puissance : & que ceste grande persecution qu'il souffre, la plus animé qu'affoibly.

Les hommes, les bonnes villes luy ont resté encore.

Il ne falloit que luy remettre le cœur au ventre, & auoir vn bon Conducateur. Dieu le luy a suscité, à sçauoir le Roy de Suede. S'il est assisté de l'Estat des Pays bas, par diuersion, de Soldats d'Angleterre & de l'argent de France il y a apparence d'une grande restauration d'affaire en ce pays là.

Q V A N T à l'Italie, il est aisé à voir, que si la France ne la secourt, il faut qu'elle succombe. Car le Roy d'Espagne en

tient ja la moitié, & le reste est diuisé en diuers Estats, dont la pluspart dependent de luy.

IL faut donc, ou que la France y possede quelque chose: ou qu'on en chasse les Espagnols. Si elle y prend pied, c'est bien pour empescher la seruitude: mais non pas pour en oster la guerre.

SI bien que le plus seur est d'en sortir les Estrangers, & de departir ce qu'ils y tiennent a des Princes Italiens: à quoy tous condescendrōt: pour l'vtilité qu'ils en recevront: & par ce moyen se rendront à iamais irreconciliables des Espagnols.

CE qui se rencontrera d'autant plus facile à executer, que l'Allemagne se trouuant en mesme temps occupée en ses guerres, le Roy d'Espagne n'en pourra tirer des soldats, sans l'assistance desquels il ne pourra subsister en Italie.

CAR pour les Suisses, ils sont trop amoureux de leur liberté: & sçauent trop bien les pretentions de la Maison d'Autriche sur eux, pour favoriser sa grandeur, quand ils verront qu'on s'y prēdra comme il faut, ny se bailler à luy. Au contraire, il tient que ceste nation

fera vne des principales forces pour deliurer le Duché de Milan de la seruitude ou il est.

Voila les vrayz & seurs moyens de mettre la Chrestienté en repos: sãs quoy il n'y faut attendre que ruines & subuersions d'Estats.

Mais ce n'est pas tout de les proposer & de les agreer. *Il faut mettre la main à l'œuvre*, tandis que l'occasion s'offre, & se munir d'une constance & resolution si forte, qu'on n'abandonne iamais ce dessein. Car quand bien l'on ne pourra par diuers accidents qui peuuent suruenir, le pourlurure par tout egaleme[n]t, pourueu que la maison de France la preigne à cœur comme la maisõ d'Autriche fait le sien, & en faire la principale affaire, elle en viendra en fin à bout.

A MESSIEURS LES PRINCES ET ESTATS, D'ITALIE

Vous doncques Princes & Estats Italiens, qui estes sous vne dure seruitude, ou en apprehension d'y tomber: qui voyez l'orage gronder sur vos testes, eueruez vous. Que le Pape ne se per-

suade pas que la reuerence de la Religion arreste le desir de dominer. Que les Venitiens se souuiennent, que l'amour qu'ils ont de conseruer leur liberté, les rend criminels de celuy qui la leur veut oster. Et que tous ceux qui fauorisent ou par amité, ou par crainte la Maison d'Autriche, apprennent icy que pour estre les derniers afferuis, ils ne seront les mieux traictez.

A MESSIEURS LES PRINCES
ESLECTEURS DE L'EMPIRE

Vous Princes Eslecteurs de l'Empire monstrez maintenant si vous l'estes d'effect comme de nom. Ne laissez escouler l'occasion qui se presente à vous. Vous auez esprouué que vostre diuision a causé vostre ruine, & que la Neutralité n'en a exempté aucun d'apprehension.

Reünissez vous, opposez vous à ceste tyrannie qui vous accable, voyez vos anciens amis qui vous tendent les mains aydez vous, vous mesmes, si vous voulez qu'on vous secoure. Hé ! quoy ? seroit-il bien possible que ceste braue &

genereuse nation qui à acquis l'Empire, & s'en est conserué la liberté de l'Electi^on, laisse auio^urd'huy perdre ceste perogatiue ? non il ne se peut, & ie croy plustost voir le Danube & le Rhin sans eau, quel'Allemagne sans liberté.

Donc animez voustous avec ceux qui vous assistent: & resoluez vo^us de iamais ne quitter les armes, que vous n'ayez remis la liberté Electorale. Apres quoy, pour la maintenir en sa vigueur, vous deuez obseruer Religieusement deux choses.

La premiere de ne designer iamais d'Empereur durant celuy qui est viuant, afin que son autorité ne preiudicie à la liberté de l'Electi^on.

La seconde, de faire vne loy fondamentale, qu'on n'eslira iamais deux Empereurs de suite d'une mesme Maison, pour euit^{er} l'abus où vous estes tombez maintenant: & que les grandes Maisons participent à leur tour à l'honneur de l'Empire.

AV ROY DES GOTHS ET
DES VANDALES

Vous Roy des Goths & des Vandales, tres vaillant & tres glorieux que Dieu a faict naistre pour le restablissement de la liberté Germanique, qui faites qu'un homme en vaut cent mil, & que cēt mil n'en valent vn, poursuidez vostre pointe, ne vous lassez point: car le prix est au bout de la course.

A V ROY D'ANGLETERRE

Vous Grand Breton, Roy d'une nation si belliqueuse, qui estes obligé au restablissement de vostre beau frere, qui devez maintenant recognoistre les trôperies Espagnoles, ne souffrez plus long temps qu'on se mocque de vous, la Iustice vous y oblige: le temps vous y conuie, & la iuste indignation vous y doit porter, avec ceste resolution de faire repentir ceux qui ont voulu abuser de vostre bonté.

A MESSIEURS DES ESTATS DV PAIS-BAS

Et vous braues Voleurs de l'Océan, qui avez osé ficher le clou en la fortune

Espagnole, & qui par vos heureuses victoires auez faict voir à tout le monde que ceste Nation n'est pas invincible, continuez vos progrès, profitez le tēps, & aydez autrui en vous bien faisant,

AV TRES VICTORIEUX
ROY DE FRANCE, ET DE NAVARRE, LOVYS, XIII.

Q V A N T à vous, GRAND ROY Tres-Chrestien, qui estes l'appuy de la liberté Chrestienne, & le grand Mobile qui faict mouvoir tous les autres, reconnoissez la facilité de ce dessein, & la gloire qui vous y est reseruee, pourueu que comme vous l'avez entrepris avec Iustice & courage, vous le poursuiuiez avec soin & constance. Dieu vous face la grace de vous y conduire par sa main, & de vous faire prosperer en telle sorte que vous en renportiez pour glorieux Trophee ce tiltre magnifique de LIBERATEUR DE LA CHRESTIENTE.

FIN.